

# Powšitkowne WOZJEWJENJA

njedźelu, 19. septembra 2021

## Wusyłanje Božeje mše

Serbskorěčnu Božu mšu móža wěriwi tutu njedźelu, 19. septembra, znowa jako live-stream w interneće scěhować. Wona přenjese so w 9 hodž. z Chróšćanskeje cyrkweje. Link na nju je pod [www.posol.de](http://www.posol.de) a na wosadneje stronje podaty.

## Nyšpor z požohnowanjom konjacych zapřahow

Towarstwo Cyrila a Metoda z.t. přeprašuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 26. septembra, w 14.00 hodž. w Chróšćicach na łuce při Hatkach. Chróšćanski cyrkwinski chór nyšpor wobrubu.

## Nazymski koncert Lipy

Chór Lipa přeprašuje zhromadnje z Křesćansko-socialnym kubłanskim skutkom na nazymski koncert, kotryž budže njedźelu, 26. septembra, w 15.30 hodž. na klósterskej zahrodže w Pančicach-Kukowje. Program wuhotuja Lipjenjo a chór Worklečanskeje Serbskeje wyšeje šule.

## Pomocna akcija spočatk nowembra

Towarstwo Cyrila a Metoda z.t. chce ze swojej akciju „Łužica pomha“ lětsa znowa diecezanski zwjazk Carity w pólskim Ełku podpěrać. Předwidžane je, zo přijědže tamniši direktor Carity, prelat dr. Dariusz Kruczyński, spočatk nowembra do Łužicy po dary. Datum hromadženja so sčasom wozjewi.

## Kubłanske dny za młodžinu w Schmiederbergu

Dekanatne dušepastyrstwo přeprašuje serbskich młodostnych na zhromadne kubłanske dny do Winfriedoweho domu w Schmiedebergu. Tute wotměja so wot pjatka do njedzele, 15. do 17. oktobra. Přizjewjenja přijimuju hač do wutory, 5. oktobra, ale jeničce online. Link je pod [www.posol.de](http://www.posol.de) wozjewjeny. Tam nańdu zajimcy tež dalše informacije.

## Potrjechenym powodženja w zapadže pomhać

Za wopory powodženja w zapadneje Němskej hromadži Towarstwo Cyrila a Metoda z.t. (TCM) ze swojej akciju „Łužica pomha“ dary za potrjechenych wosady we Weilerswische juhozapadne Kölna. Tam bydlaca młoda serbska swójba je zwisk sprosředkowała. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Weilerswist“ přepokazać. Štóz swoju dospołnu adresu poda, tomu wustaji TCM darowansku kwitowanku.

## **Biskopa Spülbeckowy wizionarny wobraz wo cyrkwi**

Smochčanske kubłanišćo swjateho Bena přeprošuje wšitkich zajimcow na seminar wo biskopa Otta Spülbeckowym wizionarnym wobrazu wo cyrkwi a jeho wuznamje za přitomnosť. Tón wotměje so wot pjatka do njedźele, 15. do 17. oktobra, z prezidentom Centralneho komiteja katolikow (ZdK) Thomasom Sternbergom a Drježdžansko-Mišnjanskim biskopom Heinrichom Timmereversom. Pod nadpismom „Jedni we wěrnosći a wjeselu“, hesle biskopa Otta Spülbecka, budu Christian März (Drježdžany), Ralf Miggelbrink (Essen), Joachim Schmiedl (Vallendar) a Peter-Paul Straube (Budyšin) přednošować. Na programje steja tež rozmołwy z časowymi swědkami kaž z emeritownym biskopom Joachimom Reineltom a bamžowskim čestnym prelatom Bernhardom Rachwalskim.

Wjeršk seminara ma być Boža mša z biskopom Timmereversom, sobotu, 16. oktobra, we 18 hodź. w Budyskej tachantskej cyrkwi. Na njej zahaji wón za Drježdžansko-Mišnjanske biskopstwo wot bamža Franciskusa wuwolany swětowy Synodalny puć. Do toho budže w 15 hodź. na samsnym městnje prezident ZdK, profesor dr. Thomas Sternberg k temje „Što je naš přinošk za swět? – cyrkej w Němskej před synodu w Romje“ přednošować. Zajimcy za přednošk a kemše měli so přizjewić. Link k tomu je pod [www.posol.de](http://www.posol.de) podaty. Štóž so za cyłkowny seminar zajimuje, měł so hač do štwórtka, 30. septembra, pod [www.bildungsgut-schmochtitz.de/anmeldung](http://www.bildungsgut-schmochtitz.de/anmeldung), z mejlku pod [info@bg-schmochtitz.de](mailto:info@bg-schmochtitz.de) abo telefonisce pod čisłom (03 59 35) 2 20 přizjewić. Tam zhonja tež plaćiznu. Studenća dóstanu 50procentowske potuńšenje.